

Nuwe Lied Bediening

En Hy het 'n nuwe lied in my mond gegee, 'n lofsang tot eer van onse Elohiem (Ps. 40:4)

E-pos: kontak@nuwelied.info
Webwerf: <http://www.nuwelied.info>

Yeshua is die Boom van die Lewe. Wanneer ons die Torah bestudeer moet ons onthou dat Yeshua Messias die Lewende Torah is – die Woord van YHVH wat vlees geword het. Hy is die weg na die waarheid wat lewe gee – die Lewende Manna wat uit die hemel gestuur is. Sonder Yeshua wat deur die Afgesonderde Gees in ons, en deur ons lewe, sal die geskrewe Torah net die dooie letter van die wet wees!!

Parashah 24: Vayikra (ויקרא) – Hy het Geroep

יהוה *het Moshe geroep en met hom gepraat vanaf die Tent van Ontmoeting en gesê.....* Lev. 1:1 – PWL¹

Torah: Lev. 1:1 tot 6:7 (Afrikaanse Ou Vertaling²)

Haftorah: Jes. 43:21 tot 44:23

Nuwe Verbond: Mark. 7:1 tot 30; Rom. 8:1 tot 13; Heb. 9:11 tot 28; 10:1 tot 22; 13:10 tot 16.

Hierdie notas is aanvullend tot die vorige notas vir parashah 24 wat afgelaai kan word by: [Parashah24Notas14](#) of by [Parashah24Notas15](#).

Live near to God, and so all things will appear to you little in comparison with eternal realities – Robert Murray M'Cheyne.

Torah Bespreking

Geroep Tot Geregtigheid

Die Hebreuse naam van die derde boek van YHVH se onderrig en instruksies (Torah), is *Vayikra* (ויקרא) en beteken: *Hy het geroep*, naamlik dat YHVH het Moses geroep! Moses is geroep om die onderrig en instruksies te ontvang hoe Israel by wyse van die offerandes nader aan YHVH en in die regte verhouding met hulle God van Verlossing moet leef. Die doel van

¹ Alle teksverwysings is geneem uit PWL Vertaling, behalwe waar anders vermeld. Die PWL Vertaling (Pad van Waarheid tot die Lewe) kan gratis afgelaai word by www.padwlewe.ch, maar is ook nou in gedrukte formaat beskikbaar. Om 'n kopie van die Bybel te bekom kan Gerrie Coetzee per e-pos by padwlewe@yahoo.com of telefonies by 074 361 2134 gekontak word..

² Volgens sommige vertalings, soos byvoorbeeld in die *Complete Jewish Bible* is Lev. 6:1 tot 7 deel van hoofstuk vyf van Levitikus.

die offerandes (*korban*)³ is om die sondaar te reinig (byvoorbeeld die sondoffer) sodat hy weer in YHVH se teenwoordigheid kan staan in 'n verhouding wat herstel is. Dit is dan die kerndoel van die offerandes, naamlik om nader aan YHVH te beweeg en die verhouding tussen die mens en YHVH te herstel, maar ook om dankbaarheid te betoon (byvoorbeeld die spysoffer).

Tot op hede in ons Torahstudie het ons geleer dat YHVH vir Israel uit Egipte bevry het met die doel om hulle na die Beloofde Land, Kanaän, te neem om daar as 'n koninkryk van priesters en as 'n volk afgesonder vir YHVH te woon (Ex. 19:5 en 6). Vir die doel het YHVH met Israel 'n bloedverbond, bekend as die boek van die verbond, gesluit (Ex. 19:5 tot 24:11)⁴.

Maar weens Israel se sonde van die aanbidding van die goue kalf het YHVH deur Moses vir Israel al die onderrig en instruksies van die boek van die wet gegee wat hulle moes onderhou tot YHVH sy Seun sou stuur om in die plek van Israel vir die verbreking van die boek van die (bloed)verbond te sterf en so Israel se sondeskuld sou betaal. Hierdie wetboek was Israel, asook die vreemdeling wat geglo het in die God van Abraham, Isak en Jakob, se tugmeester ('n gids wat Israel vergesel het) tot Yeshua se folterdood en opstanding.

Die geskrewe wet was dus vir ons 'n gids na Die Gesalfde Een toe sodat ons onskuldig verklaar kan word deur vertrouwe, maar sedert die vertrouwe gekom het, is ons nie onder 'n gids nie, want julle is almal kinders van God deur die vertrouwe in Yeshua, Die Gesalfde Een, want julle almal wat in Die Gesalfde Een gedoop is, het Die Gesalfde Een aangetrek. Daar is nie Jood of Arameër nie, daar is nie slaaf of vryman nie, daar is nie man of vrou nie, maar julle is almal een in eenheid met Die Gesalfde Een, Yeshua. As julle aan Die Gesalfde Een behoort, is julle die saad van Avraham en volgens die belofte, erfgename. Gal. 3:24 tot 29.

Gehoorsaamheid aan al die onderrig en instruksies van die boek van die wet (die geskrewe wet) het verseker dat elkeen wat glo in YHVH in die regte verhouding met sy Skepper-God kon lewe. Dit het die onderrig en instruksies bevat hoe om 'n afgesonderde (heilige) volk vir YHVH te wees. Daarom kan Lev. 11:45 as die sleutelteks van hierdie boek beskou word:

want Ek is יהיה wat julle uit die land van Mitzrayim uitgebring het om julle God te wees. Julle moet daarom afgesonderd wees omdat Ek afgesonderd is.

Daarom is Levitikus die onderrig en instruksies aan Israel hoe om by wyse van die offerandes nader aan YHVH te beweeg, asook hoe om in die regte verhouding met hulle God van Verlossing te leef tot Yeshua sou kom op YHVH se bepaalde tyd.

Maar heirdie boek van die wet was 'n voortdurende aanklag teen Israel omrede niemand die wet volkome kon onderhou nie. Die apostel Jakobus stel dit soos volg:

Wie ook al die hele geskrewe wet gehoorsaam, maar in een ding struikel, word deur die hele wet skuldig bevind. Jak. 2:10.

³ *Korban* is afkomstig van die grondwoord *karov* wat die volgende beteken: *toenadering, om naby te kom* en om 'n verhouding aan te knoop.

⁴ Hierdie verbond het die verbond net Abraham 'bevestig' en het voortgevloei deur Israel se vertrouwe in die bloed van die geslagde paaslam op die vooraand van hulle bevryding van die slawejuk van Egipte (Ex. 12:1 tot 23)

Daarom leer ons in die boek van Levitikus dat elkeen wat weens swakheid en onwetend sondig, moes 'n sondoffer (Hebreeus: *Chatas*) bring (Lev. 4:1 tot 5:13; 6:24 tot 30; 8:14 tot 17; 16:3 tot 22). Die geskrewe wet (die boek van die wet) het dus vir elke Israeliet 'n skuldslas en 'n gewetenslas geword. Dit het 'n vloek geword (Gal. 3:13), vanweë die swakheid (sieklikheid) van die menslike vlees – *omdat die wet swak was vanweë die sieklikheid van die vlees* (Rom. 8:3)!

Daarom skryf Paulus in sy brief aan die Galasiërs, en met verwysing na Deut. 27:26, die volgende:

want almal wat 'staatmaak op die onderhouding van die wet,' is onder 'n vloek, want daar is geskryf: "Vervloek is elkeen wat nie voortdurend alles sal doen wat in hierdie boek van die wet geskryf is nie." Gal. 3:10.

In sy brief aan die Galasiërs bevestig Paulus weereens dat niemand deur onderhouding van die geskrewe wet, naamlik deur die werke van die wet, geregverdig kan word nie. Nee, ons kan alleenlik deur vertroue in Yeshua as die gekruisigde en opgestane Messias deur YHVH-God regverdig verklaar word.

Ons wat van nature Jode en nie sondaars vanuit die ander nasies is nie, weet dat die mens nie onskuldig verklaar word vanuit die doen van die geskrewe wet nie, maar deur vertroue in Yeshua, Die Gesalfde Een. Ons het ook in Die Gesalfde Een, Yeshua, vertrou sodat ons onskuldig verklaar kon word vanuit vertroue in Die Gesalfde Een en nie vanuit die doen van die geskrewe wet nie omdat deur die doen van die geskrewe wet geen mens onskuldig verklaar sal word nie," Gal. 2:15 en 16.

Dat 'n mens nie deur die geskrewe wet by God onskuldig verklaar word nie, is duidelik, want dit is geskrywe: "Die onskuldige sal deur vertroue leef," maar die geskrewe wet was nie vanuit vertroue nie, maar wie ook al dié dinge doen wat daarin geskrywe is, sal daarin lewe."

Die Gesalfde Een het ons losgekoop van die vloek van die geskrewe wet deur in ons plek 'n Vloek te word, want daar is geskryf: "Vervloek is elkeen wat aan 'n hout hang" sodat die seën van Avraham na die ander nasies kon kom deur Die Gesalfde Een, Yeshua en dat ons die belofte van die Gees deur vertroue mag ontvang. Gal. 3:11 tot 14.

Die boek van die wet kon die mens nie vrymaak van sonde en veroordeling nie. Dit het Paulus ook in sy brief (Hoofstuk 7) aan die Romeine duidelik gemaak. Die rede is dat die wet swak is in vergeleke met die begeertes van die vlees om te wil sondig – om die wet te wil oortree. Die fout dus is nie die wet nie, want die geskrewe wet is afgesonderd en die opdragte is afgesonderd, regverdig en goed (Rom. 7:12). Dit is die onbesnede hart van die mens wat vleeslike dinge bedink en begeer. Hierdie gedagtes van die vlees is die geestelike dood en dit is vyandskap teen YHVH (Rom. 8:6 en 7).

Die boek van die wet het ons geleer wat sonde is en in die opsig is dit afgesonder (heilig) en goed! Maar weens die mens se vleeslike swakheid tot sonde het die wet elkeen voortdurend skuldig bevind en veroordeel.

Die enigste oplossing om hiervan vry te kom, is dat die mens se sondeskuld afgeskryf moet word en dat die mens sy vlees (sonde aard) moet oorwin. Dan sal elkeen kan terugkeer om te stap in die voetspore van Abraham en volgens die Melgisedek priesterorde! Dan sal elkeen die nageslag van Abraham wees en die seëninge van Abraham deelagtig wees.

Dit is dan inderwaarheid die doel van die boek van die wet, naamlik dit was ons gids (tugmeester) na Yeshua Messias toe!

Die geskrewe wet was dus vir ons 'n gids na Die Gesalfde Een toe sodat ons onskuldig verklaar kan word deur vertrou. Gal. 3:24.

En met die folterdood van Yeshua is die skuldbrief vir die oortreding van die boek van die wet aan die folterpaal vasgeslaan.

Hy het die geskrewe aanklag teen ons, wat vir ons nadelig was, deur Sy Outoriteit, uitgegee en uit ons midde weggevat en dit aan Sy kruis vasgeslaan. Kol. 2:14.

Daarmee het Yeshua die skuld betaal vir Israel se verbreking van die boek van die verbond (Ex. 19:4 tot 24:11).

Soos in vorige parashot bespreek is, is dit egter nodig om weer aan die volgende herinner te word, naamlik:

- Omrede hierdie boek van die verbond 'n bloedverbond tussen YHVH en Israel is, moet die een wat die verbond verbreek, naamlik Israel, sterf. Daarom wou YHVH vir Israel na die aanbidding van die goue kalf uitwis (Ex. 32:10). Maar Moses het as middelaar opgetree en namens Israel om genade gesmeek (Ex. 32:11 tot 14).
- YHVH het Sy gedagtes verander oor die skade wat Hy gesê het Hy Sy volk sou aandoen (Ex. 32:14). Daarom het YHVH vir Israel die boek van die wet gegee om hulle in 'bewaring' te hou tot Yeshua sou kom om in Israel se plek die skuld te betaal.

Elkeen wat glo in Yeshua as die Messias, se sondeskuld, naamlik die oortreding van die boek van die wet, is vergewe en afgeskryf. Die skuldslas en gewetenslas is nou verwyder!

Maar om in die voetspore van Abraham volgens die Melgisédek priesterorde te stap moet die gelowige se sondige vlees (sonde aard) ook oorwin word. Yeshua se folterdood en opstanding het ook dit moontlik gemaak! Paulus verduidelik dit soos volg:

Ons is saam met Hom begrawe in die doop tot die dood sodat net soos Die Gesalfde Een uit die dood uit opgestaan het deur die Gemanifesteerde Teenwoordigheid van Sy Vader, ons ook net so in 'n nuwe lewe kan leef,

want as ons een geword het met Hom deur dieselfde dood as Hy, sal ons ook een wees met Hom in dieselfde opstanding as Hy.

Ons weet dat ons ou mens saam met Hom gekruisig is sodat die liggaam van sonde vernietig sou word sodat ons nie langer 'n slaaf van die sonde sal wees nie,
want hy wat dood is, het homself van die sonde bevry.

As ons daarom saam met Die Gesalfde Een dood is, laat ons vertrou dat ons saam met Die Gesalfde Een sal lewe

omdat ons weet dat Die Gesalfde Een opgestaan het uit die dood en nie weer sal sterf nie en die dood geen outoriteit oor Hom het nie.

Hy wat dood is vir die sonde, het een maal gesterf en omdat Hy leef, leef Hy vir God. Net so moet julle ook julleself beskou as dood vir die sonde en dat julle leef vir God in eenheid met ons Meester, Yeshua, Die Gesalfde Een. Rom. 6:4 tot 11.

Deur vertrou in Yeshua beskou ons onself as saam met Messias gekruisig sodat die liggaam – die vleeslike begeertes – vernietig is en dat ons nie langer meer ‘n slaaf van die sonde is nie! Deur vertrou in Yeshua is ons dood vir die sonde en neem ons die outoriteit oor sonde.

Die sonde sal daarom nie in julle dooie liggame heers, asof julle aan sy begeertes gehoorsaam sou wees nie.

Moet ook nie julle lede aanbied as wapens vir boosheid tot sonde nie, maar bied julleself aan vir God as mense wat uit die dood uit lewend is en julle lede sal wapens wees vir die onpartydige opregtheid van God.

*Sonde het nie outoriteit oor julle nie, **want julle is nie onder die geskrewe wet nie, maar onder onverdiende guns.** Rom. 6:12 tot 14*

Deur die onverdiende guns in Yeshua is ons nie meer onder die geskrewe wet (die boek van die wet) nie! Maar dit beteken nie ons is vry van die wet nie, soos Paulus dit bevestig:

Kanselleer ons daardeur die geskrewe wet deur vertrou? 'n Verwerplike gedagte! Intendeel, ons bevestig die wet. Rom. 3:31.

Verwarrend? Nee, wat Paulus ons leer is dat ons is vry van die werke van die offerandes wat die boek van die wet voorskryf, want in Yeshua het elkeen van hierdie offerandes tot ‘n einde gekom. Yeshua was die eenmalige offer wat al hierdie fisiese offerandes vervang het.

Daarom deur vertrou in Yeshua bevestig ons die geskrewe wet in die sin daarvan dat ons skuldig staan, maar deur die onverdiende guns van YHVH in Yeshua is ons vrygespreek van ons sondeskuld en van die vereistes om fisies te gaan offer!

Die Levitiese priesterorde het vereis dat daar daaglik dieselfde slagoffers gebring moes word, hoewel dit nooit die sondes kon wegneem nie (Heb. 10:11). Maar Yeshua as die ewige Melgisédek Hoofpriester het, nadat Hy een slagoffer vir die sondes gebring het, gaan sit aan die regterhand van God (Heb. 10:12).

Daar is daarom geen veroordeling in Yeshua, Die Gesalfde Een, vir dié wat nie in die vlees leef nie, want die wet van die Gees van Lewe, wat in Yeshua, Die Gesalfde Een, is, het jou vrygemaak van die wet van die sonde en van dood, Rom. 8:2 en 3.

Die wet van die sonde en die dood is die boek van die wet. Maar die wet van die Gees van die Lewe in Yeshua is die Torah van Yeshua en die nuwe verbond van die herstelde Melgisédek orde. Die verbond met Abraham en die boek van die verbond het nou in Yeshua ‘n werklikheid geword. Daarom kan Petrus met verwysing na Ex. 19:5 en 6, verklaar:

Julle is 'n gekose nasie, om te dien as priesters in die Koninkryk, 'n afgesonderde volk,⁸ bymeekaargemaak en bevry, om die lofprysing van Hom, wat julle uit die duisternis geroep het, te verkondig tot Sy wonderlike lig, julle wat vroeër geen volk was nie, maar nou die volk van God is; vir wie niemand omgee het nie, maar nou word omgee oor julle uitgestort. 1 Pet. 2:9

Nou is dit die Afgesonderde Gees wat ons leer en herinner hoe om dit waarvan die boek van die wet ‘n skaduwee was, in die nuwe verbond toe te pas!

YHVH het ons geroep tot Sy geregtigheid en Sy geregtigheid is deur vertrou in Yeshua as die gekruisigde en opgestane Messias.

Daarom is ons ambassadeurs namens Die Gesalfde Een, asof God julle uitnooi deur ons; daarom vra ons julle, namens Die Gesalfde Een: laat julle verhouding met God herstel, want Hy wat geen sonde geken het nie, het Homself in jou plek 'n sondoffer gemaak sodat ons deur Hom, die onpartydige opregtheid van God kan word. 2 Kor. 5:20 en 21

YHVH se geregtigheid is nie te vinde in die boek van die wet nie, maar wel in Yeshua, Die Gesalfde Een! Soek daarom eers die koninkryk van YHVH en Sy geregtigheid en dan sal daar aan al ons ander behoeftes voldoen word. (Matt. 6:33). Die wat dit nie doen nie is besig om hulle eie geregtigheid op te rig en die geregtigheid van YHVH te verwerp.

Ons nader tot YHVH alleenlik deur Yeshua en nie deur die voorgeskrewe offerandes soos dit in Levitikus uiteengesit word nie. Dit was slegs 'n skaduwee van die toekomstige heerlijkheid van Yeshua wat aan die kom was

Bepeins of Bespreek

1. Rabbynse Judaïsme wat Yeshua verwerp het, is steeds skuldig aan wat geskryf is in die boek van die wet – die geskrewe wet. Vanweë die gebrek aan 'n tempel en priesterorde kan hulle nie offer nie. Hulle verwerp dat Yeshua namens hulle die skuld vir die oortreding van die boek van die wet gedra het. Dit is dan die groot rede vir hulle verlange na 'n tempel en priesterorde! Maar sal YHVH hulle offerandes aanvaar indien daar weer in Jerusalem 'n tempel is en 'n Levitiese priesterskap funksioneer?
2. Daar is verskeie Skrifverwysings wat waarsku dat indien daar voortgegaan word met die werke van die vlees, sal so 'n persoon nie die koninkryk van YHVH beërwe nie (Gal. 5:19 tot 21; Kol. 3:5 tot 9; 1 Kor. 3:3). Geregtigheid is dus meer as net vertrou in die vergifnis van sonde deur die folterdood van Yeshua. Dit vereis ook 'n bepaalde handeling van die gelowige. Dit vereis om YHVH se geregtigheid te ken en daaraan te voldoen. Die gelowige moet YHVH se geregtigheid soos dit in Yeshua vervul is, doen (Ps. 106:3; Eseg. 18:21; 1 Joh. 2:29; 1 Joh. 3:7). Hoe doen ons YHVH se geregtigheid?
3. Gehoorsaamheid is die bewys van my vertrou in Yeshua en dat ek die geregtigheid van YHVH is. Maar geloof sonder werke is nuttelose en dooie geloof (Jak. 2:14 tot 20). Ons Vader Abraham is ons voorbeeld: Hy is geregverdig uit die werke toe hy Isak op die altaar geoffer het. Sy geloof het saamgewerk met sy werke en sy geloof het volkome geword uit sy werke (Jak. 2:21 en 22). Op die wyse is die Skrif vervul wat sê:

En Abraham het God geglo, en dit is hom tot geregtigheid gereken, en hy is 'n vriend van God genoem. Sien julle dan nou dat die mens geregverdig word uit die werke en nie alleen uit die geloof nie? Jak. 2:23 en 24.

Abraham is die vader van almal wat glo (Rom. 4:11), maar nadat hy deur vertrou geregverdig verklaar is, het hy steeds na YHVH se stem geluister en Sy ordeninge, gebooie, insettinge en wette onderhou (Gen. 26:4 en 5).

Luister wat skryf die Apostel Johannes:

En hieraan weet ons dat ons Hom ken: as ons sy gebooie bewaar. Hy wat sê: Ek ken Hom, en sy gebooie nie bewaar nie, is 'n leuenaar en in hom is die waarheid nie. Maar elkeen wat sy woord bewaar, in hom het die liefde van God waarlik volmaak geword. Hieraan weet ons dat ons in Hom is. 1 Joh. 2:3 tot 5.

-o-o-o-o-o-o-o-

Ontvang YHVH se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).

Shabbat Shalom.

Johan.

Epos: kontak@nuwelielied.info

Webwerf: <http://www.nuwelielied.info>

Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.